

續
文
獻
通
考

續文獻通考卷之八十九

皇明進士雲間王圻纂輯

職官考 工部 行中書省 御史臺

工部堂屬

遼北面以宜徽北南二院掌御前祇應之事視工部 南

面工部尚書下侍郎郎中員外郎並同吏部

金工部尚書一員正三品侍郎一員正四品郎中一員從

五品掌修造營建法式諸作工匠屯田山林川澤之禁

江河隄岸道路橋梁之事員外郎一員從六品

貞祐五年無員

實司官天德三年增二員

主事二員從七品

今史十八人內女直四人譯史一人通事

人

覆實司管勾一員從七品隸戶工部掌覆實營造材物
工匠價等事

右三部檢法司司正二員正八品檢法從八品二十四
員職事與左三部檢法同

先受制付大定
四年命給勅

元制工部尚書三員正三品掌天下營造百工之政令凡
城池之修濬土木之繕葺財物之給受工匠之程式銓
注屬院司匠之官悉以任之世祖中統元年右三部置
尚書二員至元元年始分立工部尚書二十三年
定尚書以二員爲額明年以漕務煩冗增尚書二員
三十八年省一員侍郎二員郎中二員員外郎二員品
秩與吏部同主事五員所屬附見

諸色人匠總管府秩正三品掌百工之技藝定置達魯花赤一員總管一員同知副總管各二員經歷知事提控案牘各一員又有令史奏差等人所屬十一 梵像提舉司提舉一員從五品同提舉副提舉吏目各一員董繪畫佛像及土木刻削之工初爲梵像局延祐三年改名 出蠟局提舉司官秩俱同上掌出蠟鑄造之工至元十二年置局延祐三年陞提舉司 鑄瀉等銅局大使一員從七品副使一員掌鑄瀉之工至元十年始置初有管勾一員後省 銀局大使一員從七品直長一員掌金銀之工 鑄鐵局大使一員從八品掌鑄鐵之工 瑪瑙玉局直長一員從八品掌琢磨之工 石

局大使一員從七品管勾一員董攻石之工 木局大使一員從七品直長一員董攻木之工 油漆局副使一員用從七品印董髹漆之工 諸物庫提領一員正九品副使一員掌出納諸物之事管領隨路人匠都提領所提領一員大使一員俱受省檄掌工匠詞訟之事 已上俱至元十二年始置

諸司局人匠總管府秩正三品其官有達魯花赤副達魯花赤總管同知各一員經歷等員俱與諸色人匠總管府同領兩都金銀器及符牌等一十四局事至元十四年置二十四年以八局改隸工部及金王府止領五局一庫掌毯毼等事所屬六 改支庫大使一員秩正

九品掌出納之物 大都鹽局大使一員秩從七品副
使一員管人匠一百二十有五戶 大都染局大使一
員秩從九品管人匠六千有三戶 鹽局大使一員秩
從九品副使一員管人匠九十七戶 隆興鹽局大使
一員副使一員管人匠一百戶 剪毛花毯蠟布局大
使副使各一員管人匠一百十有八戶 提舉右八作
司提舉二員秩正六品同提舉副提舉各一員掌出納
內府漆器紅氈捎隻等并在都局院造作鑲鐵銅鋼鋤
石東南簡鐵兩都支持皮毛雜色羊毛生熟料皮馬牛
等皮駝尾雜行沙里陀等物初置提領八作司至元二
十五年改提舉二十九年以出納委積分爲左右兩司

諸路雜造總管府秩正三品至元十四年置達魯花赤一員總管同知副總管各一員知事提控案牘各一員所屬二 簾綱局大使副使各一員並受省制至元元年置 收支庫大使副使各一員至元三十年置

茶迭兒局總管府秩正三品管領諸色人匠造作等事初至元十六年始置總管一員二十七年又置同知一員後定置府官達魯花赤一員總管一員同知如舊知事與提控案牘各一員所屬二 諸司局提領一員用從七品印相副官二員中統三年置 收支庫提領一員大使副使各一員掌造作出納之物俱隸茶迭兒局大都人匠總管府秩正三品設官俱與茶迭兒局同所

屬四 繡局大使一員用從七品印副使一員掌繡造
諸王百官段疋 文錦總院提領大使副使各一員掌
織諸王百官段疋涿州羅局提領大使各一員掌織造
紗羅段疋 尚方庫提領大使副使各一員掌出納絲
金顏料

隨路諸色民匠都總管府秩正三品掌仁宗潛邸諸色
人匠延祐六年撥隸崇祥院後又屬將作院至治三年
歸隸工部設官與大都人匠總管府同時多副總官一
員經歷一員照磨一員所屬五 織染人匠提舉司秩
從七品至大二年設達魯花赤一員提舉同提舉副提
舉吏目各一員 雜造人匠提舉司品秩設官同上

大都諸色人匠提舉司秩從五品設置官屬俱同織染人匠提舉司 大都等處織造提舉司品秩官屬俱同上掌阿難荅王位下人匠一千三百九十八人 收支諸物庫提領一員秩從七品大使副使各一員又庫子二人 提舉都城所提舉二員秩從五品同提舉副提舉各二員吏目一員掌繕修都城內外倉庫事至元三年置其屬左右廂官四員用從九品印至元十三年置 受給庫秩正八品提舉大使副使各一員掌京城內外營造木石等事至元十三年置 符牌局品秩設官俱與受給庫同時多直長一員掌造虎符等至元十七年置 旋匠提舉司秩從五品提舉副提舉各一員三

元九年置撒答刺欺提舉司秩正五品設官同上多提
案牘一員初造撒答刺欺與絲紬同局造作遂改組
織人匠提舉司爲撒答刺欺提舉司 別失八里局秩
從七品大使副使各一員掌織造御用領袖納失失等
段疋至元十三年置 忽丹八里局大使一員給從七
品印至元十三年置 平則門窩場提領大使副使各
一員至元十三年置給從六品印光熙門窩場其設官
同上特秩從八品至元二十五年置大都皮貨所至元
二十九年置通州皮貨所延祐六年置設官俱與平則
門等同特秩從九品 晉寧路織染提舉司提舉一員
所屬提領所一匠局十一各提領副提領一員 冀寧

真定織染提舉司各置提舉同提舉副提舉一員所屬
開除局與真定紗羅兼雜造局各大使副使一員

南宮中山織染提舉司中山劉元帥局中山察魯局深
州趙良局弘州人匠提舉司納失失毛段二局朔州毛
子局恩州東昌局保真織染提舉司大名人匠提舉司
永平路紋錦等局提舉司雲州織染提舉司別失八里
局宣德府織染提舉司宣德八魯局東平路疇局興和
路尋麻林人匠提舉司巡河提領所深州雲內州大同
恩州大寧路順德路彰德路懷慶路東聖州陽門天城
各織染局 已上皆屬工部設官止一二員

仁虞院即虞部武宗至大元年改鷹坊爲仁虞院秩正

二品命右丞相脫脫等爲院使領其事至是築呼鷹臺於灤州澤中此不屬工部以其事同故附

皇明

本朝置工部尚書非古也自漢文帝置尚書有民曹主凡吏民上書後漢光武改民曹主繕修工作鹽池園苑魏署左民尚書亦領其職晉宋齊梁陳營宗廟宮室則權置起部尚書事畢則省後周有冬官大司空卿其屬工部中大夫二人至隋開皇三年乃有工部尚書統工部屯田二曹唐承隋制不改龍朔二年改爲司平大常伯咸亨元年復舊光宅元年又改爲冬官神龍元年復舊總判工部屯田虞部水部事沿及趙宋相因不改然皆

爲尚書省屬官與周官大司空掌邦土之任固有間矣
國初沿唐宋之制設工部尚書侍郎之職掌天下百工
山澤之政令仍屬中書省 洪武十三年革中書省陞
六部每部分四子部各設郎中員外郎主事於是工部
其屬有四曰營部曰虞部曰水部曰屯部 二十九年
改營部爲營繕虞部爲虞衡水部爲都水屯部爲屯田
俱稱清吏司永爲定制然 國家自罷相以來工部尚
書侍郎即大小司空之職歷 洪熙 宣德 正統間
吳中以工部尚書加至少師領尚書事固隱然三公領
六卿之任矣 景泰以後凡工部尚書加至三孤宮保
者後先相望第 國家多事土木日興加之川貴吳楚

生意消鑠民力竭于採辦極矣而當時之臣復肆侵牟不復爲生民遠慮於是題派紛出不能任怨裁抑國家何賴于斯官哉惟工部改置北京肇自永樂辛丑其總督易州山廠肇自宣德五年初以都御史李儀董之立廠于平山正統初年改置沙魚口陳恭王永壽相繼以工部尚書侍郎督廠事及景泰四年又改廠于清縣天順元年又改廠于易州率以爲常其間雖有通政等官督廠事而尚書侍郎主事實多至嘉靖六年尚書劉麟議題裁革不設

工部尚書一人左右侍郎各一人易州廠侍郎一人其屬司務二人營繕虞衡都水屯田四清吏司各郎中一

人員外郎一人主事二人添設郎中虞衡二人都水四
人屯田一人員外郎營繕二人虞衡二人主事營繕四
人都水八人監生九十七人所屬衙門營繕所所正一
人副二人丞四人文思院大使一人副使四人軍器局
皮作局各大使一人副使二人寶源局鞍轡局廣積通
積通州白河抽分竹木局織染所雜造局各大使一人
副使一人蘆溝橋抽分竹木局大使一人副使三人大
通關提舉一人典吏一人吏一百四十九人

尚書掌工役農田山川澤藪河渠之政令侍郎爲之貳
凡制命敷奏率其屬奉其職業以贊天子倡百司
康兆民營繕掌經營興造之事以贊尚書凡內府宮

殿陵寢城壕壇場祠廟廨署倉庫營房之役鳩力會財
以時省之 王卽亦如之郡王將軍中尉主君與卽貲
有差凡鹵簿儀仗樂器移內府及下諸屬各以其職治
之省其堅絮而董其竄濫凡置獄具必如律凡工匠二
等曰輪班曰住坐凡工囚二等曰正工曰雜工雜工三
日當正工一日凡撮工歇工視役煩省節其財力凡會
有無移內府虞衡掌山澤採捕厲禁陶冶之事以贊尚
書凡採捕禽獸及革骨羽毛以供祭祀賓客膳羞禮器
之用水課禽十八獸十二陸課獸十八禽十二凡軍器
軍裝移內府及下諸屬歲一造或三歲一造必堅繕諸
省亦如之凡火器曰火車曰火傘曰神鎗曰將軍四等

曰銳六等曰箭三等曰砲十二等並 內府製之給邊
鎮凡獵畋以時冬春之交罝羅不施川澤春夏之交毒
藥不施原野苗盛禁蹂躪穀登禁焚燎若害獸聽爲檻
牢獲之賞有差凡諸陵山麓不得入斧斤開窖治置墓
墳凡帝王聖賢忠義名山嶽鎮陵墓祠廟有功德於民
者禁其樵牧凡山場園林之利聽民取而薄征之凡陶
冶甕甓籍其常造乍造之數計其入慎藏之無輒毀以
煩民財力凡鑄造審其模範計其銅鐵而鎔之金牌信
符鑄之內府凡鑄錢當十當五當三折二小錢凡五等
鼓鑄於京師進於內府而頒之諸省亦如之凡顏料徵
土產不強其所無否徵其直都水掌川瀆陂池泉滌洪

決道路橋梁舟車織造券器衡量之事以贊尚書凡水利曰轉漕曰灌田歲儲其金石木竹卷掃以時修其閘壩洪淺堰圩隄防護其畜洩以備旱潦無使壞田廬墳墓禾稼舟楫碾碾者不得與灌田爭利灌田者不得與轉漕爭利凡水役以農隙急則驟理之而轉漕之役最大歲費財力百萬計凡水要會京朝官專領之以督有司凡鱗介萑蒲之利聽民取而薄征之凡道路塞其坑坎巡幸若大喪大禮治而新之凡橋梁曰舟梁曰石梁鉅工創修之大津不能梁官給舟人量其大小難易而食之凡舟七等曰董船曰馬快船曰海運船曰鮮船曰備倭船曰戰船曰糧船糧船之用最急費最大皆會其

財用下諸司酌其多寡又近勞逸而均劑之凡車三等
曰大車曰小車曰戰車亦如之凡織造 冕服誥勅制
帛祭服埴衣諸幣布 內府南京諸省供之周知其數
而慎節之凡公侯伯鐵券差其廣高公二等侯三等伯
二等凡祭器 冊寶乘輿牌符雜器會則於 內府凡
衡量謹其校勘而頒之懸式於市屯田掌屯農墳塋抽
分薪炭夫役之事以贊尚書凡屯田腹邊公田閒田沒
田給衛所耕劑其地力人力而徵其子粒贍官軍省餽
餉凡在邊牛犁諸器官給之凡墳營宗室勲戚文武官
各有差堂碑碣獸亦如之凡抽分征諸商率三十分取
十五取六取五取四取三取二取一凡七等凡薪炭南

取洲汀北取山麓墮或徵諸民有本折色酌其多寡而
搏節之凡夫役伐柴轉柴皆僱役周知其數而時蠲之

行中書省

即行尚書省

遼不設

金宣宗貞祐二年置行省于陝西

元制行中書省凡十秩從一品掌國庶務統郡縣鎮邊鄙
與都省爲表裏初有征伐之役分任軍旅之事皆稱行
省未有定制中統至元間始分立行中書省因事設官
官不必備皆以省官出領其事其丞相皆以宰執行某
處省事係銜其後嫌於外重改爲某處行中書省凡錢
糧丘甲屯種漕運軍國重事無不領之 至元二十四

年改行尚書省尋復如舊 至大二年又改行尚書省
二年復如故每省丞相一員從一品平章二員從二品
一員左丞一員右丞正二品叅知政事二員從二品甘
肅嶺北二省各減一員郎中二員從五品員外郎二員
從六品都事二員從七品掾吏蒙古必闍赤回回令史
通事知印宣使各省設員有差 至治二年正月詔行
省平章後兼軍政重者以聞輕者遂決舊制叅政之下
有簽省有同簽之屬後罷不置丞相或置或不置尤慎
于擇人故徃徃缺焉

河南江北等處行中書省至元五年罷隨路奧魯官詔
叅政阿里愼行省事於河南等路立省二十八年以河

南江北係衝要之地又新入版圖宜於汴梁立省以控
治之遂署其地統有河南十二路七府 浙江等處行
中書省至元十三年初置江淮行省治揚州二十一年
以地里民事非便遷於杭州二十二年割江北諸郡隸
河南牧曰浙江行省統有三十路一府 江西等處行
中書省至元十四年置十五年併入福建行省十七年
仍置省于龍興府而福建自爲行省治泉州二十二年
以福建行省併入江西二十三年又以福建省併入江
浙本省統有十八路 成宗元貞三年尋罷嗣後武宗
至大以迨泰定不常設 湖廣等處行中書省至元十
一年右丞相伯顏伐宋置行中書省於襄陽尋以別將

分省鄂州爲荊湖等路行中書省十三年取潭州即置
省治之十八年復徙置鄂州統有三十路三府 陝西
等處行中書省中統元年以商挺領秦蜀五路四川行
省事三年改立陝西四川行中書省治京兆至元三年
移治利州十七年復還京兆十八年分省四川尋改立
四川宣慰司二十年仍合爲陝西四川行省二十三年
四川立行樞密院本省所轄之地惟陝西四路五府
四川等處行中書省總於陝西至元十八年以陝西行
中書分省四川二十三年始置四川行省治成都統有
九路五府元貞三年罷四川行省七年復立以雲南平
章脫脫湖廣平章程鵬飛並爲平章 遼陽等處行中

書省至元二十四年始置泊遼陽路統有七路一府
甘肅等處行中書省中統二年立行省於中興十年罷
之十八年復立二十二年復罷改立宣慰司二十三年
徙置中興省于甘州立甘肅行省三十一年分省按治
寧夏尋併歸之本省治甘州路統有七路二州 嶺北
等處行中書省初太祖定都於哈刺和林河之西因名
其城曰和林立元昌路中統元年世祖遷都中興始置
宣慰司都元帥府大德十一年改立和林等處行中書
省右丞相左丞相各一員至大四年省右丞相皇慶元
年改嶺北等處行中書省設官如上治和寧統有北邊
等處 雲南等處行中書省即古南詔之地初世祖征

取以爲郡縣曾封建宗王鎮撫其軍民至元十一年始
置行省治中慶路統有三十七路五府 征東等處行
中書省至元二十年以征日本國命高麗王置省典軍
興之務師還而罷成宗元貞三年復立哈散言王昨不
能服其人宜遺官共理之遂立征東行省以濶里吉思
爲平章元貞五年罷大德三年復立以中國之法治之
旣而王言其非便詔罷行省從其國俗至治元年復置
以高麗王燕領丞相得旨奏選屬官治瀋陽統二府一
司五道 至正十二年又置淮南江北等處行中書省
於揚州以淮西宣慰司兩淮塩運司及揚州淮安徐州
唐州安豐蘄黃皆隸焉除平章二人左右丞各一人叅

政二人首領官屬共二十五人平章兼提調淮南

王府事鑄

淮南江北等處行中書省

印給之十六年又置福建等處行中書

省於福州二十六年又置福建江西等處行中書省十八年又立行中書省於占城以唆都爲右丞到深爲左丞也里迷失叅知政事

先是延祐七年三月罷設行省丞相於是河南行省也先帖木兒河南丞相朶兒只的斤並降本省平章惟征東丞相高麗王不降

行省官屬

元置檢校所檢校一人照磨所照磨一人架閣庫管勾一人理問所理問二人副理問一人知事提控案牘各一

人
都鎮撫司都鎮撫一人副都鎮撫一人

中書分省

元

至正十一年置中書分省於濟寧以松壽爲叅知政事置
兵刑戶工四部十二年以中書左右丞相分省於彰德
是後嘗置右丞以守禦十五年彰德分省除右丞左丞
各一人十七年又以平章蒼蘭叅政俺音崔敏分省陵
州又以平章臧卜分省冀寧後擴廓帖木兒兵至冀寧
分省遂罷二十七年復以添設平章蠻子兼知院分省
保定以太保左丞相也速里領軍馬分省山東沙藍答
里仍中書左丞相知樞密院分省大同又置分省於冀

寧總管爲叅政鑄印給之凡事必咨大同分省而後行
焉是年又置分省於真定

元史評曰自唐有三省中書爲政本門下主封駁至尚
書省而施行焉是謂南牙皆宰相所居以出政令之所
歷代因之今江淮有省則是以宰相行藩鎮之事矣宰
相而行藩鎮之事則是內外政權皆歸之矣且天子元
首也宰相股肱也都督置左右相而十二行省復置十
二丞相何股肱如是之多也使一人之身而股肱以十
數則將何所從令乎元之政權不歸於上而終以覆亡
者蓋權輿於此

皇明洪武丙辰秋八月改浙江等行中書省爲承宣布政

使司及設都指揮使司提刑按察使司于各省遂定官制先是仍元爲行中書省或分中書省六部尚書往往出爲叅知政事叅政入爲尚書至是始改爲布政使司左右布政各一人從二品左右叅政各一人從三品左右叅議各一人從四品叅政叅議因事添設無定員其屬經歷一人從六品都事各一人從七品照磨一人從八品檢校正九品司獄正九品理問一人從六品副理問一人從七品按察司按察使一人正三品副使正四品僉事正五品副使僉事因事添設無定員其屬經歷一人正七品知事一人正八品司獄從九品照磨一人正九品檢校一人從九品都司都指揮使正二品都指

揮同知從二品都指揮僉事正三品經歷正六品都事
正七品斷事正六品副斷事正七品司獄從九品亦設
武學教授從九品訓導吏目俱未入流是謂三司官並
治省城又置各衛指揮使正三品指揮同知從三品指
揮僉事正四品經歷從七品知事正九品鎮撫正六品
各所正千戶正五品副千戶從五品百戶正六品各所
鎮撫從六品吏目從九品分設各省要害以防禦云又
置各省市舶提舉河渠提舉俱從五品副皆從六品吏
目從九品衛河提舉清江提舉俱正八品副皆正九品
典史未入流

御史臺

遼南面有御史臺太宗會同元年置其官曰御史大夫曰御史中丞曰侍御史

金御史臺置御史大夫從二品掌糾察朝儀彈劾官邪勘鞫官府公事凡內外刑獄所屬理斷不當有陳訴者付臺治之御史中丞一員從三品侍御史二員從五品以上官品皆大定十二年通陞掌奏事判臺事治書侍御史二員正七品每遇朝對立于龍墀之下專劾朝者儀矩凡百僚假告事具奏日進呈監察御史十二員正七品掌糾察內外非違刷磨諸司宗帳并監祭禮及出使之事典事二員從七品登聞鼓院隸焉 架閣庫管勾一員檢法四員俱從八品獄丞二員從九品

海陵天德三年謂御史大夫趙賢德曰汝等多徇私情未聞彈劾朕甚不取自今百官有不法者必當舉劾無憚權貴

世宗大定二年正月劾御史臺檢察六部文移稽而不行行而失當者皆舉劾十七年八月上謂御史中丞紇石烈邈曰臺臣糾察吏治之能否務去其擾民且冀其得賢也今所至輒受訟牒聽其妄告使爲政者如何則可十九年三月制糾彈之官知有犯法而不舉者減犯人一等科之關親者許回避二十九年二月勅御史臺自今監察令本臺辟舉任內不稱職者亦從奏罷十一月御史臺奏臺官不得與人相見蓋爲親王宰執

怙勢之家恐有私徇則無以訪知民間利病官吏善惡
詔自今許與四品以下相見三品以上如故

章宗明昌四年三月勅自今御史臺奏事修起居注並令
迴避承安二年十二月勅御史臺糾察諂佞趨走有實
跡者泰和二年四月諭御史臺諸訴事于臺當以實聞
不得輒稱察知

元

初制御史臺掌糾察百官善惡政治得失 世祖至元五
年始立臺建官改侍書爲治書侍御史 皇慶後定置
御史大夫二員從二品經歷一員從五品都事二員正
七品照磨一員正八品承發管勾兼獄丞一員正八品

架閣庫管勾兼承發一員正九品

世祖至元七年趙天麟上策請更定憲臺品秩策畧曰方今御史臺官內有監察院以隸之外有廉訪司以承之所以儆肅百僚風憲萬姓張理上下整齊人道也御史之職非天子視聽之官而何哉是以霜蘭露車栢林石室昭其清也授以立秋象以熒惑昭其嚴也鷹擊之諭豸冠之服昭其威也干步清道王公遜避昭其重也中書門下並爲三司昭其貴也五者備矣然後能觸佞指邪彰善燁惡使雄奸巨媚膽破聲消封豕長蛇骨寒心顫則狐狸眇害蠹蠹微毒將不治而自息矣今國家令御史臺凡百官之非違諸司之案牘朝會祭祀之事理

斷失宜之類以至於該載不盡應合糾察者並行糾察之其制可謂恢而不漏矣然阿合馬擅政於前桑哥弄權於後雖牛馬走亦知側耳而憎也而臺官以下察院之屬閉口吞聲見如不見宴居高坐聞若不聞此由省府之職秩懸隔而不敢抗衡故也伏望陛下厲憲臺之風采俾行省以齊階首之以御史大夫一員使與行省首官品秩相同其餘員位以次陞之又宜命監察御史與六部侍郎品秩相同又宜立繡衣使者八員於中丞之下秩同侍御史使之分使天下專糾行臺及廉訪司之不如法者又內臺或有愆違宜命天下皆得舉法如罪狀明白委爲故犯重則投諸四裔以禦魑魅輕則免

官禁錮放歸里閭如或妄舉反坐其人聖王之御下也
用而不疑疑而不用委任之而禮貌之及其得罪則是
臣下自以其罪加乎身也幸從臣言則邪佞難蔽而中
外永清矣

元立憲臺時阿合馬曰庶務責成各路錢穀付之轉運
必繩治之事何由辨蕭希憲曰立臺察內則彈劾奸邪
外則察視非常訪求民瘼裨益國政事無大於此者阿
合馬語塞乃止 至元十六年二月詔議省臺事宜先
是阿合馬奏自今御史臺非白于省毋得擅召倉庫吏
亦毋究錢穀數及集議中書不至者罪之於是行省因
請考核行臺文卷不從阿里伯復請行臺呈行省比內

臺呈都省例詔集朝臣議之董文用曰御史臺譬如卧虎雖未噬人人猶畏其爲虎虛名僅存綱紀猶不振一旦摧抑之則風采蕭然無復望矣御史大夫王昔帖木兒亦言其不可事就寢 十九年十一月勅御史臺得選用御史中丞崔或言國政得失生民休戚百官邪正雖王公將相亦宜糾察今惟御史有言臣以爲臺官皆當建白又選用臺察若由中書必有偏徇合從本臺擇選御史初用漢人十六員今用蒙古十六員相叅巡歷從之 二十五年以董文用爲御史中丞文用曰中丞不當理細務宜舉用賢才乃舉胡祗適王恽雷膺荆勿紀許楫孔從道等十餘人爲按察使徐琰魏初爲行臺

中丞當時以爲極選

仁宗皇慶元年正月勅振舉臺綱上諭御史大夫塔思不花曰凡大臣不法卿等劾奏毋避朕自裁之

順帝至正三年三月詔作新風憲在內之官有不法者監察御史劾之在外之官有不法者行臺監察御史劾之歲以八月終出巡次年四月中還司

殿中侍御史

元制殿中侍御史二員正四品至元五年始置秩正七品後陞正四品凡大朝會百官班序其失儀失列則糾罰之在京百官到任假告事故出三日不報者則糾舉之大臣入內奏事則隨以入凡不可與聞之人則糾避之

監察御史

金選監察御史尚書省具才能者疏名進呈以聽制候任滿御史臺奏其能否仍視其所察公事具書于解由以送尚書省如所察事皆無謬戾爲稱則有陞擢庸常者臨期取旨不稱者降除任未滿者不許改除 大定二十七年前嘗令六十以上者爲之後臺官以年老者多廢事爲言乃勅尚書于省六品七品內取六十以下庶幹者備選 二十九年令臺官得自辟舉 明昌三年復命尚書省擬注每一缺則具三人或五人之名取旨授之 承安三年勅監察給由必經部而後呈省 泰和元年制猛安謀克並隸按察司監察御史止按部提

舉有罪則并坐監臨之官又御史臺奏在制按察司官
比任終遣官考覈然後尚書省命官覆察之今監察御
史添設員多宜分路巡行女直漢人各一人同往仍分
爲四路四年制以給由其所察事之大小多寡定其優
劣七年勅尚書省自今初受監察者令進利害帖子
以待召見八年定制事有失糾察者以怠慢治事
貞祐元年減定監察御史爲十二員二年定監察御
史黜陟格以所察大事至五小事至十爲稱職數不及
且無切務者爲庸常數內有二事不實者爲不稱職
四年命臺官辟舉以名申省定其可否興定元年以
縣官或非才監察御史一過不能備知遂令每歲兩遣

監察御史巡察 三年定御史上下半月勾檢省中制
勅文字 四年減監察御史四員五年勅監察御史所
彈事同列不得與聞著爲令

御史秩正七品司耳目之寄任刺舉之事 至元五年
始置御史十一員悉以漢人爲之 八年增置六員
十九年增至一十六員始參用蒙古人爲之 二十二
年參用南儒二人書史二十三人

元世祖時立御史臺以姚天福爲監察御史每廷折權臣
上嘉其直賜名已見恩謂其不畏強禦猶虎也仍厚賜
以旌之天福曰臣職居糾彈惟尸祿是懼敢貪厚賞以
重臣罪乎時置二大夫綱紀無統天福言于上曰古稱

一蛇九尾首動尾隨一蛇二首不能寸進今臺網不振
有二首之患不急拯之久將不可理矣上召王昔帖木
兒孛羅諭之孛羅以年幼自効

行御史臺

金熙宗皇統二年定行臺官品皆下中臺一等

元世祖至元十四年始置江南行御史臺於揚州尋徙杭
州又徙江州二十三年遷於建康以監臨東南諸省
統制各道憲司總諸內臺初置大夫中丞侍御史治書
侍御史各一員統淮東淮西湖北浙東浙西江東江西
湖南八道提刑按察司十五年增江南湖北嶺南廣
西福建廣東三道二十三年以淮東淮西山南三道

撥隸內臺 三十年增海北海南一道 大德元年定
爲江南諸道行御史臺官九員以監浙江江西湖廣三
省統江東江西浙東浙西湖南湖北廣東廣西福建海
南十道大夫一員中丞二員侍御史二員治書侍御史
二員經歷一員都督二員照磨一員架閣庫管勾一員
承發管勾兼獄丞一員 二十三年正月罷行御史臺
二月復立行臺臺臣言近中書奏罷行臺改按察司爲
提刑轉運司使兼錢穀而糾彈之職遂廢請丞相安童
與老臣議於是安童亦言江南盜賊屢起行臺鎮遏居
多然與行省並治杭州地甚遠僻江州居江浙湖南江
西三省之間徙之爲便從之已而復還杭州 陝西諸

道行御史臺設官品秩同內臺監察御史如內察院

至元二十三年增蒙古御史與漢人御史共二十八人
二十七年始置雲南諸路行御史臺官止四員 大

德元年移雲南行臺於京兆爲陝西行臺而雲南改立
廉訪司 延祐元年罷二年復立統漢中隴北四川雲

南四道定制大夫一員御史中丞二員侍御史二員治
書侍御史二員經歷一員 大德元年改雲南行臺定

天下爲二十二道內八道隸中臺山東河東道濟南置
司河東山西道太原置司燕南河北道真定置司江北
河南道汴梁置司淮西江北大道廬州置司山南江北大道
荊州置司江北淮東道揚州置司山北遼東道大寧置

司河南十道隸南臺江東建康道寧國置司江西湖東
道隆興置司江南浙西道杭州置司浙東海右道婺州
置司嶺北湖南道潭州置司嶺南廣西道靜江置司海
北海南道雷州置司福建閩海道福州置司江南湖北
道武昌置司陝西四道隸西臺陝西漢中道鳳翔置司
河西隴北道甘州置司西蜀四川道成都置司雲南諸
道中慶置司 至元二十三年集賢直學士程文海言
省院諸司皆以南人叅之惟御史臺按察司無之江南
風俗南人所諳惟參用之乃詔文海仍集賢院學士兼
侍御史臺事

皇明

本朝初置諫院左右司諫各一人左右正言各一人

太祖吳元年設御史臺從一品湯和鄧愈爲左右御史大夫劉基章溢御史中丞又有侍御史治書侍御史殿中侍御史及經歷都事照磨管勾監察御史譯事引進使

洪武十年七月 詔遣監察御史巡按州縣 十三

年改正二品設左右中丞是年罷御史臺 十五年改

都察院正七品設監察都御史八人以秀才李原明詹

徽等爲監察御史又分設浙江江西福建北平廣西四

川山東廣東河南陝西湖廣山西十二道監察御史正

九品鑄監察御史印文曰繩愆糾繆 十六年陞正三

品設司務 十七年陞正二品定設都御史一人副都

御史左右各一人僉都御史左右各一人經歷一人都事一人十二道各設監察御史以詹徽爲左都御史建文元年罷左右都御史設都御史一人副僉都御史各一人二年改爲御史府設御史大夫正二品革十二道置察院一御史二十八人改諸御史爲拾遺補闕靖難後復故其北平貴州交趾雲南改置如刑部若巡撫之名本始於懿文太子巡撫陝西取巡守撫軍之義永樂中乃以文臣巡撫尚書侍郎通政叅議少卿寺丞皆得奉勅行事景泰中耿九疇以侍郎出守陝西始改憲職自後凡巡撫總督必以都御史尚書侍郎必兼都御史無定員

都察院左右都御史各一人左右副都御史各一人左右
僉都御史各一人其屬經歷司經歷都事各一人司
務二人照磨所照磨一人檢校一人司獄一人十三道
監察御史河南浙江江西山東各十人福建廣東廣西
四川貴州各七人陝西湖廣山西各八人雲南十一人
司獄六人在外都御史或副僉都御史總督陝西軍務
一人總督宣大一人總督遼薊一人總督漕運兼巡撫
江北一人總督糧儲兼巡撫江南一人總督南京糧儲
一人提督兩廣軍務兼巡撫一人提督南贛汀漳軍務
兼巡撫一人提督紫荆三關巡撫保定等府一人提督
鴈門三關巡撫山西一人總理河道一人贊理軍務兼

巡撫陝西一人提督軍務兼巡撫浙江一人提督軍務
兼巡撫福建一人甘肅一人寧夏一人延綏一人大同
一人宣府一人遼東一人湖廣一人四川一人雲南一
人貴州一人整飭薊州邊備巡撫順天等府一人撫治
鄖陽等處一人巡撫河南一人山東一人江西一人鹽
法屯田督餉採木計賊禦虜總制經畧巡視無常員監
生二百五十人吏三百三十二人

左右都御史掌風紀副僉都御史爲之貳凡大臣奸邪
小人構黨作威福亂朝政則劾凡百官猥葺貪冒則劾
凡學術不正上書陳言變亂成憲希求進用或才德無
聞挺身自拔則劾以憲綱督監察御史凡監察御史出

巡復命覈其稱職不稱職聞上凡考察內外百官會於吏部選用風憲亦如之凡讞罪囚鞠大獄會於外朝若京畿道凡有寃抑與雪理凡制訊囚徒會刑部大理寺凡畿省死刑獻平奏上凡勅差者各奉勅行事大抵內地專職拊循邊鎮軍務爲重其有事暫設者事畢而罷即遣尚書侍郎必兼都御史經歷都事典出入文移叙差御史司務典叅謁受事照磨檢校典磨勘卷宗十三道監察御史有分道無專官一人嘗兼數道河南道獨掌內外官考察之事十三道各奉其職監察內外百司糾劾官邪大班露章面劾或封章奏劾凡差在內京畿道刷卷及巡視京營提學巡倉巡庫巡視光祿巡

青恤軍監課在外巡按清軍劄卷巡鹽巡河巡關巡茶
印馬屯田捕盜盤糧勘事征行則監軍紀功各以其事
審功而糾過凡差三等點差上二人奏差上一人劄差
不請上諸差巡按爲要凡 朝會糾儀祭祀監禮凡政
令得失軍民利病得直言凡出巡得舉劾諸司官凡罪
囚巡按審錄有故出入理辯之凡獄 勅下臺推按奏
上常獄擬罪移評大理寺不當再訊三訊至於五六訊
必允乃已凡有大政集 闕廷預議焉凡犯罪加三等
有贓重論

按國初制一循元舊當是時左右大夫湯和鄧愈數膺
斧鉞寄外出而中丞劉基章溢理臺事其後汪廣洋陳

寧輩俱遷大夫 洪武十三年胡惟庸事發而御史臺

僅設左右中丞俱正二品侍御史正四品而已 十四

年始改爲都察院然僅正七品其官有御史而無都御

史 十六年仍爲正三品明年爲正二品於是定設左

右都御史正二品左右副都御史正三品左右僉都御

史正四品職糾劾官邪申辯冤抑而御史分爲十三道

御史巡按以至他公委出則奏請還則考覈然御史獨

不係都察院以示得相糾察之意 建文初改爲御史

府設都御史一員左右副都御史各一員品如故十三

道御史曰左右兩院監察御史 永樂鼎革悉復 洪

武之制其後移都察院於北京而留都曰南京都察院

畧如六部矣其以左右都御史而下總督提督叅贊巡撫各鎮者初自本院出曰公差事完或得代則回理院事其後不勝多則往往自部佐卿寺藩臬遷轉亦不復歸院以爲恒

太祖洪武戊申黜御史論劾不實者時陶安爲江西叅政有御史言安隱微之過太祖曰朕素知安豈宜有此且爾何由知之對曰臣聞之道路太祖曰御史但取道路之言以毀譽人以此爲盡職乎命黜其人中書省臣進曰御史職當言路有失乞容之太祖曰不然夫植嘉禾者必去蟬音蟬蠹長良田者必芟狼莠任正人者必絕邪人凡邪人之事君必先結以小信然後逞其

大詐此人嘗有言朕不疑而聽之故今日乃爲此妄言
夫去小人當如撲火及其未盛而撲之則易爲力不然
則害滋大竟黜之 是年春正月以浙東按察僉事章
溢爲御史中丞溢之居憲臺也務存大體不屑屑于細
故人或以爲言溢曰憲臺百司之表儀居其職者當先
養人以廉耻使人避而不犯豈直恃搏擊爲能哉自是
臺聲藉藉未幾以母憂去任 太祖惻然曰吾固知其
情不可奪但朕憲臺缺人耳

宣宗宣德中都御史邵玘

蘭溪人

掌南京都察院事嘗奉

命考察御史黜其不肖者二十餘人人服其公明與顧
佐齊聲價玘少孤力學嘗侵晨赴館遇厲壇聞其中啾

啾驟馳一鬼曰曰都堂來矣尚擾攘耶心竊識之又
一日渡西門河大風沒舟獨爲水漂至岸而免甫起時
有物負其足比登岸視之一屍也收而瘞之其人夜夢
來謝曰感都堂厚恩及我也玆益心自異 永樂丙戌
登進士爲御史歷官至今職

黃氏瑜曰玆居母憂哀毀盡禮所居產芝再歷官藩臬
有聲蓋孝廉人也瑛觀誅後人猶效尤成風賊獫狴籍
至玆憲臺爲之一清蓋陳瑛爲左都御史以酷誅劉觀
爲右都御史以貪誅

謝文祥字元吉

湖廣東陽人

登成化丙戌進士選庶吉士改

御史性峭直數上封事直氣動臺端謫海南縣丞李文

正劉忠宣俱壯其節以詩贈之陳白沙有詩去湖南枉
史不可當八尺長驅滿面霜平生契合羅與莊忠言決
死驚廟堂天子置之淮南邦何事不上湖南航淮南木
落終悲傷年三十七即掛冠歸吁身雖隱而節彌彰是
以後之君子有聞於元吉之賢也

何氏孟春曰 高皇帝稽古定制改前代御史大夫中
丞爲都御史臺爲察院是以察而統公署之號也以監
察御史分設十三道革去侍御史殿中侍諸名銜而糾
劾巡按照刷問擬之任一切責之監察是以察而統爲
憲臣之號也御史從前代重矣監察之尤重未有如我
朝者也任是職者欲無負 朝廷耳目之所寄則凡

續文獻通考卷之八十九終
事無所不當察官吏之賢否察之得爲之激揚兵民之
利病察之得爲之興除風俗之美惡察之得爲之移易
刑賞之輕重察之得爲之勸沮變故之隱伏察之獄訟
之冤抑察之得爲之消弭清雪察事之中又皆得言事
焉

續文獻通考卷之九十

皇明進士雲間王圻纂輯

職官考 御史分臺行臺省學士院至太常寺

御史分臺

元 世祖至元二十五年御史大夫完者帖木兒奏江南諸道行御史臺衙門常奉旨於紹興路開設近因道梗湖南北廣東西海北江西福建等處凡有文書北至南臺風信不便徑申內臺未委事情虛實宜於福建置分臺給降印信俾湖南諸道文書由分臺以達內臺於事體爲便從之凡省臺院吏曰掾史獨江南行臺作令史者蓋因至元十四年初立行臺曰御史大夫授三品秩

故也後雖陞一品而樂因循者不爲申明改正西臺立視南臺已陞品秩則曰掾史焉

行臺省

遼 南面官東丹國有中臺省太宗天顯六年四月置聖宗初年罷

金熙宗天會十五年罷劉豫置行臺尚書省于汴天眷元年以河南地與宋遂改燕京樞密爲行臺尚書省三年復移置于汴京

元無

皇明

總督漕運初 太祖有天下漕東南粟於海以管遼東

五年屬靖海侯吳禎後卒乃遣都督朱壽張赫領之
二十年冬十月享太廟封壽舳艫侯赫航海侯又嘗
建漕運使尋罷成祖始命平江伯陳瑄治漕河內
地贍北京景泰二年特命都御史王竑總督與總
兵叅將同理其事尋令淮揚廬鳳四府徐和滁三州屬
竑巡撫監督常盈倉以淮爲治所至成化八年改巡
撫總漕各設一員明年復舊正德十三年又各設一
員十六年復嘉靖三十六年又改各設一員四
十年復巡撫自永樂十九年命吏部尚書蹇義巡
行南畿考察官吏至宣德五年始命刑部右侍郎
曹弘巡撫正統八年又命工部右侍郎王永和巡

撫 十三年又 命刑部右侍郎薛希璉吏部尚書趙
新相繼巡撫然未奉漕 命

總理漕運兼提督軍務巡撫鳳陽等處兼管河道一員

永樂間設漕運武臣 景泰二年因漕運不繼 命

都御史總督與總兵叅將同理其事因兼巡撫淮揚廬
鳳四府徐和滁三州 成化八年分巡撫總漕各設一

員 九年復舊 正德十三年又各設 十六年復舊

嘉靖三十六年以倭警添設提督軍務巡撫鳳陽都

御史 四十年會議歸併改總督漕運兼督軍務巡撫

鳳陽等處地方 萬曆七年加兼管河道

總督薊遼保定等處軍務兼理糧餉一員 先年薊遼

有警間遣重臣巡視或稱提督 嘉靖二十九年以虜

患改爲總督薊州保定遼東軍務鎮巡以下悉聽節制

三十三年以密雲咫尺 陵京接連黃花渤海去石

塘嶺古北口牆子嶺各不滿百里移總督駐密雲巡撫

駐薊州防秋之日改駐昌平而總督遂定設 萬曆九

年加兼巡撫順天等府地方 十一年除巡撫如舊

總督宣大山西等處地方軍務兼理糧餉一員 正統

元年遣都御史巡撫宣大 景泰二年宣大各設巡撫

而遣尚書總理宣大軍務 成弘間有警則遣 正德

八年設總制一員鎮巡以下兼管糧郎中俱聽節制

嘉靖間 命總督官兼督偏保及理糧餉時設時革至

二十九年始定設去備保改山西 三十八年令防秋
日總督領標兵駐宣府東路巡撫領標兵車遊兵駐岔
山道 四十三年 命宣大山西總督移駐懷來以備
南山一帶宣府鎮巡官移駐延慶山西鎮巡官移駐廣
昌 隆慶四年令總督移駐陽和 六年 命防秋畢
日各兵備副叅以下文武官悉聽總督官查覈功罪舉
劾

總督陝西三邊軍務一員 弘治十年議遣重臣總制
陝西甘肅延綏寧夏軍務 十五年以後或設或革
嘉靖四年始定設四鎮兵馬錢糧一應軍務從宜處置
鎮巡以下悉聽節制軍前不用 命者都指揮以下聽

以軍法從事 七年易三邊總督軍務 勅書開防初
原銜稱總制至是 上以制非臣子所宜總更曰督令
指揮知府以下違令者聽自收訊 十六年奏准三邊
總督於五六月間親臨花馬池調集延寧奇遊等兵赴
平虜城等處併力防禦其陝西巡撫亦于五六月間往
固原調度兵食候探無大勢虜情及秋盡冬初邊腹收
成俱畢方許照常居中調度巡撫官仍還本鎮

總督兩廣軍務兼理糧餉帶管鹽法兼巡撫廣東地方
一員 永樂初遣官巡視廣西 十九年遣官巡撫廣
東 正統 景泰間以兩廣宜協濟應援始設總制

成化元年 命兼巡撫定于梧州駐劄處置猺獞流賊

一應事務聽便宜行事各該將官并三司官悉聽節制

正德十一年改總督爲提督 嘉靖四十五年以廣

東有警 命總督止兼巡撫廣西駐肇慶而于廣東另

設巡撫駐惠州 隆慶三年添設廣西巡撫除兼職

四年復革廣東巡撫改爲提督兩廣軍務兼理糧餉巡

撫廣東其廣西新設巡撫與兩廣總兵叅遊守備并三

司等官俱聽節制 萬曆二年以惠潮有寇暫移提督

駐潮州事平復歸肇慶 三年改總督加帶管鹽法

總理糧儲提督軍務兼巡撫應天等府地方一員 永

樂初遣尚書往江南治水患兼理農務 十九年 勅

尚書巡撫畿甸然未專設 宣德五年 命侍郎總督

稅糧兼巡撫應天等府始有專職 景泰四年定遣都御史 嘉靖三十三年以倭警令應天巡撫都御史提督軍務當風汛時駐劄蘇州嚴督防守 萬曆間以道里不均題准駐劄句容

提督軍務巡撫浙江等處地方一員 永樂初遣尚書治兩浙農事以後或巡視或督餉有事則遣無定設

嘉靖二十六年以海警始 命都御史巡撫浙江兼管福建福興建寧漳泉海道地方提督軍務 二十七年改巡撫爲巡視 二十八年停遣 三十一年復遣僉都提督軍務巡視浙江兼管福興泉漳地方 三十三年倭夷入犯杭州 命尚書提督浙江福建南直隸軍

務又專設都御史提督軍務巡撫浙江兼福興泉漳地方其提督三省者改總督至兼節制江西後罷至四十年止設提督軍務巡撫浙江都御史

提督軍務兼巡撫福建地方一員 永樂間遣侍郎巡視以後或鎮守或督軍以事間遣 嘉靖二十六年始

命都御史巡撫浙江兼管福興泉漳等處 三十五

年以閩浙道遠專設提督軍務兼巡視福興泉漳福寧海道都御史仍聽總督節制後改巡撫福建地方統轄全省 四十年總督亦罷其南贛軍門所轄汀州一府

仍兩屬

巡撫江西地方兼理軍務一員 永樂十九年 勅工

部侍郎巡視以後間遣鎮守巡撫 成化末始定巡撫
或時革 嘉靖六年始定設 四十年定今銜

巡撫南贛汀韶等處地方提督軍務一員 弘治十年
閩廣湖湘多盜始設巡撫所轄則江南之南安贛州建
昌福建之汀州廣東之潮州南雄湖廣之郴州四省三
司皆聽節制駐劄贛州尋增隸韶州漳州除建昌 正
德十一年改提督軍務 嘉靖八年以吉安之萬安龍
泉泰和永豐永寧撫州之樂安增轄 四十五年福建
廣東並設巡撫以惠潮漳州三府還隸本處定今名所
轄南安贛州南雄韶州汀州并郴州地方

巡撫湖廣等處地方兼提督軍務一員 正統三年

命都御史鎮守以後或侍郎大理卿出撫 景泰元年
定設都御史巡撫兼贊理軍務 萬曆八年改贊理爲
提督 十二年復爲贊理

提督軍務兼撫治鄖陽等處地方一員 成化十二年
以鄖襄流民屢叛遣都御史安撫因奏立鄖陽行都司
并府衛割陝西之漢中商州河南之南陽唐鄧四川之
夔蜀湖廣之荆襄安沔設都御史提督撫治之 萬曆
二年以本鎮所轄四省撫治事權不專添提督軍務兼
撫治鄖陽等處地方職銜 九年裁革 命湖廣巡撫
兼理 十一年復設

巡撫河南等處地方兼管河道兼提督軍務一員 宣

德五年遣侍郎巡撫山西河南 正統十四年 命都御史巡撫河南湖廣 景泰元年專設河南巡撫 萬曆七年加兼管河道 八年加提督軍務 巡撫山東等處地方督理營田兼管河道提督軍務一員 正統五年遣大理少卿巡撫山東地方 十三年始定設都御史 嘉靖四十二年加督理營田 萬曆七年加兼管河道 八年加提督軍務

整飭薊州等處邊備兼巡撫順天等府地方一員 永樂十九年 命侍郎等官巡行畿甸 正統十四年 命都御史提督軍務總督糧儲兼巡撫順天永平二府 紫荆倒馬二關然未專設 成化二年始設都御史贊

理軍務巡撫順永二府後兼撫河間真保定凡五府
七年兼理八府 八年以畿輔地廣從居庸關中分爲
二巡撫其東爲整飭薊州等處邊備巡撫順永二府都
御史以居庸等關隸之駐遵化遂定設 嘉靖二十九
年增設通州昌平易州三都御史旋議華惟薊州仍舊
萬曆九年革 十一年復設

巡撫保定等府提督紫荆等關兼管河道一員 正統
十年 命侍郎巡撫保定等處未有專設 成化八年
始從居庸關中分爲二巡撫遂專設都御史巡撫保定
真定河間順德大名廣平六府提督倒馬紫荆龍泉等
關駐真定 萬曆七年加兼管河道

巡撫遼東地方贊理軍務一員 正統元年遣都御史

巡撫遂爲定制後加贊理軍務

巡撫宣府地方贊理軍務一員 正統元年 命都御

史出巡塞北凡兵糧邊備並聽釐正巡撫之設自此始

然或兼理大同不專一鎮 成化十四年始定設後加

贊理軍務

巡撫大同地方贊理軍務一員 永樂六年 命都御

史出鎮大同旋罷 正德元年始與宣府共設巡撫

景泰三年大同始專設後復兼理 成化十年復設加

贊理軍務

提督鴈門等關兼巡撫山西地方一員 宣德五年

命兵部侍郎巡撫河南山西 正統十三年始 命都御史專撫山西鎮守鴈門 天順 成化間暫革尋復置 嘉靖間給旗牌四面副 隆慶三年令秋冬暫駐寧武關就近調度定爲巡撫山西提督鴈門等關都御史

巡撫延綏等處贊理軍務一員 宣德十年遣都御史出鎮而無專設 景泰元年以都御史叅贊軍務遂爲定制 成化九年徙鎮榆林 隆慶六年加贊理軍務巡撫寧夏地方贊理軍務一員 宣德六年 命侍郎理陝西甘肅寧夏之政 十年 命都御史鎮守陝西延綏寧夏等處未有專職 正統元年以都御史鎮撫

寧夏地方叅贊軍務整飭邊備遂爲定制 天順元年
革 二年復設去叅贊軍務 隆慶六年加贊理軍務
巡撫陝西地方贊理軍務一員 宣德間 命尚書侍
郎出鎮 正統間 命右都御史出入更代鎮守 景
泰三年改贊理軍務

巡撫甘肅等處地方贊理軍務一員 宣德十年 命
侍郎鎮守甘肅地方 正統元年甘涼多事 命侍郎
叅贊軍務出鎮于是甘肅以文臣叅贊遂爲定制 景
泰元年定爲巡撫都御史 隆慶六年改贊理軍務
提督軍務巡撫四川等處地方一員 宣德五年 命
都御史撫鎮事寧停遣 正統十四年遣都御史巡撫

四川遂定設 萬曆十一年加提督軍務

巡撫雲南兼建昌畢節等處地方贊理軍務兼督川貴糧餉一員 正統九年 命侍郎叅贊軍務 十年始

命侍郎鎮撫 天順元年革 成化十二年復設

嘉靖三十年加兼理軍務 四十三年改贊理 隆慶

二年加兼建昌畢節等處地方

巡撫貴州兼督理湖北川東等處地方提督軍務一員

正統四年 命都御史出鎮 十四年以土苗亂

命侍郎總督軍務鎮守其地 景泰元年 命大理寺

丞巡撫始專設 成化八年革 十一年復設 正德

二年革 五年復設 嘉靖七年設雲貴四川湖廣等

處總制撫勦苗蠻土夷事平革 二十七年復設沅州
駐劄 四十二年復革令貴州巡撫兼督河北川東提
督軍務

巡撫廣西地方一員廣西舊有巡撫沿革不常 隆慶
元年改總督兩廣都御史兼巡撫廣西地方 三年復
設廣西巡撫 以上俱見在巡撫

總制宣大偏關保定等處軍務一員

總督湖廣川貴軍務一員

巡撫鳳陽等處地方一員

總理河漕兼提督軍務一員 永樂九年遣尚書治河
後間遣侍郎或都御史 成化 弘治間始稱總督河

道 正德四年始定設都御史提督駐濟寧凡漕河事
悉聽區處 嘉靖二十年以都御史加工部職銜提督
河南山東直隸三省河患 隆慶四年加提督軍務
萬曆五年改總理河漕兼提督軍務 八年革
總督南京糧儲一員

整飭北直隸山西河南等處軍務糧餉一員

巡撫廣東地方兼管理軍務一員 以上俱嘉靖二十
年前設陸續任補

總督宣大山西偏堡等處軍餉一員

勘處湖廣貴州夷情一員

督理承天工務一員

巡撫浙江兼管福建福興建寧漳泉等處海道地方提督軍務一員

巡視浙江兼制隣境福建沿海地方一員

採木左副都御史一員右副都御史一員

經畧居庸山海東西二路關一員

清理兩淮兩浙山東長蘆等處鹽法部御史一員

淮徐兗州等處地方招撫營田一員

北直隸地方督理屯政一員

山西宣大地方督理屯政一員

經畧易州地方一員

駐守昌平州地方一員

通州馬箠右倉者從史一員

總理江南等處屯鹽副都御史一員

總理江北等處屯鹽僉都御史一員

總理山西等處屯鹽副都御史一員

山西宣大等處行邊侍郎一員

薊遼保定等處行邊侍郎一員

陝西延綏寧夏固原甘肅等處行邊侍郎一員

以上俱嘉靖中因事題設事畢住補

興革事例

世宗嘉靖三年令各巡撫都御史遇有遷秩或以憂去者必候代離任代者亦宜亟往如違言官劾奏 三十二

年吏部尚書李默言江南軍興調兵轉餉非一巡撫所能兼請設提督軍務大臣專剿賊而巡撫專主餉上曰督撫兩設事權得無掣肘乎其與兵部僉謀以聞於是奏設一官如浙例以屠大山爲兵侍兼僉都御史總督軍務糧儲巡撫應天三十九年嚴嵩令鄉人鄔懋卿以都御史總理天下鹽法威勢熏灼有司漁獵以供廚傳海內騷然鹽法大壞是年倭寇浙福按臣各疏請趣胡宗憲督師剿寇至是進宗憲尚書即巡撫亦聽節制而體統如三邊勲臣總兵亦由掖門通謁四十五年復設廣西巡撫初兩廣各置巡撫成化五年以事體不一更設總督大臣而罷巡撫韓雍爲督撫開府

梧州居中節制 正德十一年以體統太重改爲提督
已而惠湖二府山寇時發梧州在二千里外文檄往來
徵調爲難遂以總督撫廣東而更設巡撫于廣西

穆宗隆慶元年五月壬申戶部請遣御史四人分行天下
奉 勅查盤各倉庫所積多寡有無登記文冊一進

御覽一備戶部稽查其冒破營私一切弊政勿問官之
大小歲之遠近從實劾治從之乃 命譚啓往南直隸
浙江馬明謨往江西福建廣東廣西張問明往湖廣四
川雲南貴州趙岩往北直隸山東河南山西陝西各
賜之 勅 二年 題准凡遇推補督撫員缺吏部咨
移兵部差人齎文前去如以別官陞遷巡撫及在原籍

起用者限文到五日以巡撫陞總督者限交代次日即
各起程赴任仍將起程日期于所在衙門申報各巡按
具奏如咨文已到不即起程或已交代未便離任或未
交代擅自回籍者並叅治 四年三月裁革總督南京
糧儲都御史以其事屬之南京戶部侍郎仍設巡倉御
史一員佐之 五月裁革廣東巡撫官改兩廣總督李
遷爲提督兼廣東巡撫事 六年閏二月工部覆直隸
巡按劉曰睿疏請以蘇松嘉湖水利 勅應天浙江撫
臣兼督報可

今上萬曆二十五年兵部覆大學士沈一貫題保定山東
適中處所立巡撫專管海務查得天津登萊旅順鼎峙

海嶼順天津相隣適中去處關府其間外而大沽大
居神堂俱爲總兵結寨安營之所隨遇擇便住劄俱聽
督臣節制第新撫臣專理戰務由旅順而東則策應朝
鮮由登萊而南則策應淮揚若遼東保定山東撫鎮自
有地方責任便難以新設推諉一切戰守水陸器具照
舊上緊料理接濟協用庶彼此有益如遇出兵仍各移
鎮策應沿海司道衛所新撫臣俱得調遣管轄經理雖
遠在朝鮮而海上兵機撫鎮實相關涉全貴乎救援屬
國奇正迭施相爲表裏撫鎮既設其添置叅遊等官俟
兵漸集次第修舉查得先後調募官兵除陸兵盡發出
關征進水兵悉聽新撫鎮分布營伍總督臣調遣沿海

士卒豈無操舟識水之人亟應召募從優鼓舞聞登萊
見造船隻而天津海口有舊船可改有舟有人宜擇教
練舟師遠兵急難就至合無于浙江水營抽調三千并
催吳淞三千上緊取道前來以備急用臣等非不知各
處守禦委難空缺而本地兵數自可補募補足擁護

京畿於諸臣又所不得辭也廣兵五千已起用陳璘統
領但彼中船兵頗勁合加調三千或贍福或蒼山聽閩
廣督臣便宜簡發所有題議應行事理委曲纖悉總候
撫鎮設後通行遵依亦應載入 勅書行事 二十六

年十一月都察院奏臺臣缺人不敷 上曰朕前因科
道官喜事沽名襲尚浮薄負 君取譽結黨行私故久

不許行取近來此風頗覺移易詢嘉納諫乃朕本心覽卿等奏既各官多缺特准行取仍須博詢老成端練體國奉公之士精加選擇不必太多考選既定仍一一開具歷履考語待朕親自點用毋得仍前採訪虛浮及濫徇請託以孤慎重求賢之意 二十八年二月兵部酌議偏鎮彈丸一隅已有總兵駐劄今撫臣原爲督兵理餉而設題奉 欽依令湖廣撫臣移駐沅州城謂沅州距偏橋不遠爲該省轉運必由之區可以就近策應今既專設撫臣一意防播似應酌令駐劄沅州經理調度仍不時往來平清偏鎮之間整飭戎務簡閱兵馬督同總兵一體行事若遇應兵須移駐偏鎮以資彈壓以肅

運籌又議分轄黔州界在楚蜀之間地壤錯趾湖北川東貴州撫臣得以兼制亦犬牙相制之義也今偏沅撫臣似宜倣此例湖廣通省并川貴附近等處地方該經理撫臣俱得分轄川廣畫地分防事有專責又議節制湖廣各處兵馬副叅遊守等官撫臣應會同總兵分布調發或合營夾攻或出奇取勝偏鎮比壤隨宜應援一切固守防禦事體與總兵計議而行仍聽總督節制其各該將領遇有征勦酌量緩急遠近悉聽調遣不得執拗逗留如有抗違不用命者以軍法從事有應與貴湖巡撫會議者各須披肝露膽共濟時艱征播事情本官竭精料理不可推諉誤事凡軍民詞訟關係議兵調餉

者令其聽理以便督催其餘一切詞訟並聽各該撫臣
管理本官不得干預以淆專職而滋侵越其合月符驗
旗牌關防容本部通行各該衙門請給齎付本官欽遵
任事庶節制既明事無掣肘 又議偏沅地方當擒賊
入犯衝區而巡撫有防勦重責中軍之官似不可少合
于所屬地方挑選一萬八千兵添設中軍遊擊一員統
領以資護衛而便承宣本部查舉相應官員請 旨簡
用事寧之日一併裁革又議新推偏沅撫臣江鐸見任
易州道叅政由茲入楚刻燭可至若枉道回籍反從容
束裝乞 天語嚴加申飭務令以地方爲重星馳蒞任
料理軍事諸臣應行事宜應上方畧不妨于途次條列

上請又議巡撫開府一方其事權旣重供億必煩則標下雜流員役與夫廩給紙劄犒賞等費皆勢之必不可免者今設撫臣待將視事前項供應似不可緩合行湖廣督撫衙門將偏橋撫臣一切諸費悉心計處派解聽用無致臨時缺乏隨奉 聖旨偏沉用兵原是湖廣巡撫之責 朝廷念其地廣難徧設經理以分其勞除征勦軍機係專責外一切合用兵馬錢糧取給通省着該巡撫與督理同心上緊催趲接濟功成同賞不許有分彼此竟推經理以致不便責有所歸所轄文武官吏如有抗違着不時叅來重處

學士院

遼北面有大林牙院掌文翰之事其官曰北面都林牙曰
北面林牙承旨曰北面林牙曰左林牙曰右林牙而又
有文班未詳所掌其官曰文班太保曰文班林牙曰文
班牙署曰文班吏 南面有翰林院掌天子文翰之事
其官曰翰林都林牙曰南面林牙曰翰林學士承旨曰
翰林學士曰翰林祭酒曰知制誥 翰林畫院有翰林
畫待詔 翰林醫院有翰林醫官

金

翰林學士院

天祐三年命翰林學士院自侍讀學士
至應奉文字通設漢人十員女直契丹

各七翰林學士承旨正三品掌制撰詞命凡應奉文字

街內帶知制誥

直學士
以上同

貞祐三年陞從二品翰林學

士正三品翰林侍讀學士從三品翰林侍講學士從三

品翰林直學士從四品

員不限

翰林待制正五品

員不限分

掌詞命文字分判院事街內帶知制誥翰林修撰從六

品

員不限

掌與待制同應奉翰林文字從七品

章宗泰和六年二月有司奏應奉翰林文字溫迪罕天興

與其兄直學士思齊同撰制誥文字合無迴避詔不須

避仍著爲令

元

制翰林兼國史院秩正二品

世祖中統初以王鶚

爲翰林學士未立官署

至元元年始置二十年省并

集賢院爲翰林國史集賢院

二十一年增學士二員

二十二年復分立集賢院

延祐以後定置翰林承

旨六員從一品學士二員正二品侍讀學士二員從二

品侍講學士二員從二品直學士二員從三品屬官待制五員正五品修撰三員從六品應奉翰林文字五員從七品編修官本爲樞密院官元始爲翰林之屬十員正八品檢閱本宋樞密院檢詳之職置四員正八品典籍二員正八品經歷初爲典簿已改司直又改經歷秩從五品所領監一藝文監文宗天曆二年置階從三品設大監兼檢校書籍事二員少監同檢校書簿事二員監丞參檢校書簿事二員或有兼經筵官者以國語譯儒書及儒書合校讐者俾兼治之典簿昭磨各一員令史四人典吏二人順帝至元六年改爲崇文監令翰林國史院領之所屬三

時以宋本爲大監歐陽玄爲少監

鑑書

博士階正五品專一鑒辯書畫擇朝臣博識者爲之
藝林監階從六品大使副使各一員掌收貯書籍 廣
成局階從七品大使副使各一員直長二人掌刻經籍
及印造之事 授經郎兼經筵譯文官二員階正七品
掌教訓怯薛大臣子孫 蒙古翰林院至正八年始立
新字國學于國史院十二年別立翰林院設官品秩並
同國史院掌譯寫一切文字及頒降璽書並用蒙古新
字仍各以其國字副之

崇政殿說書附

金 哀帝正大三年置益政院于內庭以學問該博議論
宏遠者數人兼之日以二人上直備顧問講尚書通鑑

貞觀政要名則經筵實內相也

元 置端本堂說書 至元十一年徵建寧處士彭炳爲之不至

馬祖常曰夫經筵之設將以講明正學培養君德所謂經筵侍講與今翰林侍講侍讀名同而實異自漢唐以來人君聽講經史者多矣至唐穆宗始召韋處厚路隋爲侍讀命講詩書至宋司馬光程頤嘗充是選此即經筵侍講崇政殿說書也

文宗天曆二年賜潛邸說書劉道衡等四人從七品薛允等十六人從八品

順帝至正三年四月勅經筵講官月三進講 七 years 左丞

相太平請賜經筵講官坐以崇聖學

學士待制

宋理宗寶慶十二年十月甲申詔仍置學士待制以才德並稱者爲之明著令甲

殿館閣學士

遼 南面有宣政殿學士應曆時李澣嘗拜是職有觀書殿學士壽隆時王鼎嘗拜是職有昭文館直學士楊遵勗子晦嘗拜是職有崇文館大學士韓延徽嘗拜是職有乾文閣學士王觀嘗拜是職

金不置

元 有昭文館大學士 世祖至元中以竇默爲之 成

宗大德中以不忽木爲之有煥章閣學士 文宗天曆

二年命翰林煥章閣諸儒臣采輯本朝典故著經世大

典有奎章閣學士建奎章閣于西宮興聖殿之西廊爲

屋三間南間以藏物中間諸臣入直北間設御座進儒

臣集經史之書考帝王之治左右列珍玩命群玉內司

掌之閣官係銜初名奎章閣置大學士二員正三品隸

東宮屬官後文宗復位陞爲奎章閣學士院階正二品

置大學士二員並知經筵事侍書學士從二品承制學

士正三品供奉學士正四品並二員兼經筵官職 至

順元年增大學士二員共四員侍書承制供奉學士俱

增二員首領置叅書二員典籤二員照磨一員內掾四

人宣使四人知印二人譯史二人典書五人屬官授經

郎二員 順帝至元六年罷奎章閣學士院立宣文閣

惟授經郎及鑑書博士以宣文閣係銜特虞集爲奎章閣侍書學士揭

後斯爲奎章閣供奉學士群王內司階正三品置監司司尉各一

員從三品亞尉僉司各二員從四品司丞二員正五品

典簿一員正七品吏屬有差掌奎章圖籍寶玩及凡常

御之物時以禮部尚書巖巖兼監司

陶宗儀曰元初特恩初制象齒小牌五十上書奎章閣

三字一面篆字一面蒙古字與畏吾兒字分散各官懸

佩出入宮門無禁學士院凡與諸司往覆惟劄送中書

施行移而已

文宗至順元年二月奎章閣學士忽都魯都兒迷失撒廸
虞集辭職詔諭之曰昔我祖宗睿智聰明於致理之道
自然生知朕以早歲跋涉艱阻旣乏生知之明慙於治
體故立奎章閣置學士員日以祖宗明訓古今治亂得
失陳說於前使朕樂於聽聞卿等當推所學以稱朕意
其勿復辭

順帝至正元年六月復舊奎章閣爲宣文閣時大臣議悉
罷先朝閣監官屬翰林承旨巖巖言于上曰民有千金
之產尚設家塾以延館客堂堂天子富有四海而學房
乃不能容耶上然之即日改奎章閣爲宣文閣藝文監
爲崇文監設官如初就令猗猗董治因請置檢討等官

十六員以備進講達官有不欲者嗟嗟曰昔先皇以儒道致治命裕宗學于贊善王恂今經書所藏倣書當時裕宗於學生之下親署御名習書謹呈其敬重若此世祖嘗募召我先人陳說四書及古史治亂至丙夜不寐喜曰朕令卿從許平仲學正欲以嘉言入告朕耳其向學又如此今汝不好儒寧不念聖祖神宗篤好之意乎且儒者之道君仁臣忠父慈子孝從之則人倫咸得國家咸治違之則亂爾欲亂而家吾不汝禁慎勿以斯言亂吾國也達官有慙色

胡粹中評曰王恂爲贊善而令裕宗于學生之下親書御名習書謹呈其尊敬師傅奚讓于前王嗚呼賢矣

皇明

國朝稽古右文設翰林院職官以文學承顧問出入侍從
因得參謀議納諫諍其職清而地禁至 洪武三年又
法唐永徽之制設弘文館學士 十三年又法古四輔
之義設四輔官 十五年又倣宋殿閣大學士之制設
大學士凡一時耆舊乘運而奮或拔自科甲或徵自薦
舉或錄自亡國類以所學利見于世

太祖己亥年置禮賢館 命陶安劉基章溢宋濂葉琛王
禕等居之甲辰年設起居注乙巳年設大史監 吳元
年設翰林院俱爲侍臣 洪武二年定翰林官制承旨
正三品學士從三品侍讀學士正四品侍講學士從四

品直學士正五品 三年又置弘文館學士改劉基與
羅復仁危素胡鉉雖稼王大中居之 九年罷不設
十四年華承旨直學士定學士爲正五品講讀學士爲
從五品 十五年十一月倣宋殿閣大學士之制以劉
仲質爲 華蓋殿大學士吳伯宗爲 武英殿大學士
宋訥爲 文淵閣大學士吳沉爲 東閣大學士 十
六年禮部主事劉庸薦鮑恂全銓張長年張紳等明經
通達治體遣使徵之恂銓長年先至俱 命爲 文華
殿大學士皆辭不拜而全思誠亦以耆儒拜前職然大
學士之職階不過五品特以崇重文儒備顧問而已况
國朝監前代壅蔽之禍革中書省罷丞相使政歸六

卿分理不相混壓所以垂之 祖訓者甚嚴而殿閣大學士亦不久設故未有相道之責 壬午年七月 文廟入正大統注意文學肇建 內閣於東角門內 召翰林待詔解縉編修黃淮處其中又選胡廣胡儼楊士奇楊榮金幼孜與之同事雖令講讀纂修與議幾務然七人始以翰林史職入直陞講讀等官及 仁廟正位 東宮又陞春坊等官以後解縉以罪訕則謫廣西叅議胡儼以國學缺人則推陞祭酒而楊士奇等五人終永樂之世亦官止大學士蓋爲衙門所拘 洪熙初年以 東宮舊臣特加超擢又添設 謹身殿大學士於是楊士奇陞禮部侍郎兼 華蓋殿大學士楊榮陞

太常寺卿兼 謹身殿大學士黃淮陞通政使金幼孜
陞戶部侍郎俱兼 武英殿大學士楊漣陞太常寺卿
仍兼翰林院學士緊後委任日隆置三公三孤之官又
加至三孤領尚書職隱然有鈞衡之重禮與百僚殊矣
自此官制一變陳山以左庶子張瑛以洗馬各陞侍郎
兼大學士入閣然 龍飛殊恩非可爲例亦未有由蒞
部事而復入者自正統年間陳循高穀苗衷馬愉曹鼐
以學士入張益彭時商輅以修撰入則舊意猶存自
景泰初年俞剛江淵王一寧以侍郎改兼學士入蕭鉉
以祭酒陞侍郎兼學士入王文以左都御史陞吏部尚
書兼大學士入於是 天順 成化 弘治以來由侍

郎陞尚書入閣者日久因襲不可復改矣然計資叙遷
 亦未有陞至尚書已理部事而復入內閣者自 正德
 初年逆豎劉瑾用事吏部尚書焦芳首以附瑾取入內
 閣於是楊廷和由南京戶部尚書入劉宇由吏部尚書
 入曹元由兵部尚書入及逆瑾伏誅而莫之改正者何
 哉夫罷丞相分任六卿無偏聽獨斷之弊此 太祖垂
 訓立法高出千古者也但政權必有所屬則設 內閣
 而政歸六部權在 人主歷 列聖如一日使居 內
 閣者仰體 聖祖之心輸忠宣力守憲奉法於六部有
 違失密裁抑之與天下順流而治萬世無弊矣
 內閣乃翰林學士任也始 高皇帝渡江剪荆棘日不

暇給而稍從諸儒生受經是時弘文學士劉基最貴幸
當帷中寄丞相以下罔敢望之已益勦馬上業進學士
承旨宋濂濂又最幸得偕上坐起其職大抵紀注言
動備顧問云而上時時授以古使爲詔草濂獨
多所當意久之上倣宋制益置華蓋護身文
華 武英四文淵東閣二俱大學士秩正五品徵
諸明經長者以次代擢而會丞相惟庸敗折中書爲六
尚書寄天下任而大學士稱近臣不爲置僚屬無所治
天子方自操威福亦無所寄裁至文皇帝繼大
位始即文淵閣召侍講等七人日入直左右已益
親重上所與謀群臣甚秘稍遷至大學士歲時養子

同尚書矣 仁宣朝用 太子經師恩累加至三孤益尊而 宣皇帝右文遏殺內柄無大小悉下大學士士奇等取報行而吏部養義戶部夏原吉以不時 召得迭入故六尚書事與士奇均而大學士陳山等或鮮所開預豈非無顯職繇 上輕重裁耶論道之體創尊仁 宣迨 景及 憲大權始集今視之赫然真相矣其喜怒借 上意故 上不嫌逼也威福間已意故下屏息也剗自由六曹故難不與也取以 詔行故衆無敢訾也賢者當之不見跡而治不肖者當之不及亂而敗此在 人主擇所任而已矣 按內閣臣不由甲第者楊文貞以薦辟胡若思陳汝靜

張子玉以鄉舉其初不由翰林者黃文簡以中書舍人
楊文貞以審理副胡若思以桐城知縣金文敏以給事
中俞綱以審理正王毅愍薛文清俱以御史李文達以
吏部主事劉宇曹元俱以知縣袁榮襄以長史張文忠
以南刑部主事桂文襄以知縣方文襄以禮部主事夏
文愍以行人其入閣之先不帶翰林銜者王毅愍以左
都御史江世用以刑部右侍郎俞綱以兵部右侍郎徐
元玉以左副都御史許道中以太常卿薛文清以大理
卿尹文和以兵部左侍郎焦孟陽以吏部尚書王文恪
以右侍郎楊文忠以南京戶部尚書劉至大以吏部尚
書曹文貞以兵部尚書楊文襄許文簡俱以吏部尚書

入若毅愍文清文襄文貞終始不由翰林尤爲特異俞
綱劉至大僅一履任而已解大紳出爲廣西右叅議張
子玉出理南部猶帶殿銜俞綱出佐兵部以南禮部終
江世用出爲工部尚書許道中出爲陝西叅政以南禮
侍郎致仕徐元玉出爲福建叅政尋就逮戊岳文肅出
爲欽州同知以興化知府致仕自岳後無下遷者矣

又按 內閣臣職在司內外制而已未有所謂調 旨
也自 宣德中大學士二楊公與尚書寒夏始有調
旨之說而二楊公復以位尊惡煩特奏以少詹事兼講
讀學士曾蔡王直王英專知 誥 勅然 內閣實總
之後蔡卒直英遷禮部侍郎仍司 內制直出理部事

遷吏書英出理部事而以侍講學士陳循馬愉侍講曹

鼐代之尋革併入內閣弘治甲寅復奏以學士李

東陽兼禮部右侍郎掌誥勅說者以爲爲李公入

閣地也李入閣太常卿程敏政代敏政以禮侍致仕禮

侍傅瀚遷尚書吏侍吳寬代以尚書卒太常卿張元禎

代元禎以吏侍卒詹事楊廷和代廷和改南京戶部左

侍郎吏部尚書梁儲代儲改南京吏部尚書劉忠代忠

入閣禮部尚書白鉞代鉞卒吏部侍郎靳貴代貴以禮

書入閣吏部侍郎蔣冕代冕遷禮書入閣禮部尚書毛

紀代紀入閣禮部尚書劉春代春卒禮部尚書李遜學

代遜學卒吏部尚書石瑄代瑄入閣吏部侍郎賈詠代

詠入閣禮部尚書吳一鵬代鵬出理部事吏部侍郎溫
仁和代以憂歸自是大學士張桂等密疏不宜設而
旨報罷矣

又按 東閣在左順門廊接史館雖有大學士官其職
在 文淵閣而司 誥 勅官多坐 東閣爲侍從之
長故總謂之閣老然不參預政務非真相也 嘉靖末

內閣以其兩 制官不文始奏設翰林講讀史官分
掌外制而武官 誥 勅仍用其屬之能文者理之若
詔赦 勅草之類仍自閣臣翰林諸臣不得與

又按 文淵閣在 午門內 文華殿南諸學士日有
大政會議則居之 天順丁丑冬十月始置先師孔子

等像于閣中先是學士每入以東西兩凳相對坐向無公座至是李賢自吏部入欲循品秩設公座如部堂之儀彭時不可曰宣宗駕常幸此中坐故至今不敢南面賢曰事久矣今設何妨對曰禁中亦不宜南面坐賢駁曰烏有居是官而不正其位者時曰正位在外諸衙門則可禁內則不可也欲正坐則華蓋武英諸殿大學士當何如耶蓋殿閣皆至尊臨幸之處設官之意止有侍坐備顧問決無正坐之理賢語塞意未釋已而英宗遣太監侍恭送銅範餽金孔子并四配像一龕置閣中賢乃止自是閣老每晨入對像一揖遇朔望率翰林官行四拜禮乃東西對坐載誦

宣廟 御制文淵閣銘有序曰古昔帝王之有天下旣建朝堂以聽政則必有怡神養性之所萃天下之書延天下之士相與講論道德而資啓沃焉我 太祖皇帝始創宮殿于南京即于 奉天殿之東建 文淵閣盡貯古今載籍置大學士員而凡翰林之臣皆集焉萬幾之暇輒臨閣中 命儒臣進講經史躬自披閱終日忘倦以天縱之資加日新之學道德之懿仁義之實充然洽于天下 成祖肇建北京亦開閣于東廡之南爲屋若干楹高亢明爽清嚴邃密仍榜曰 文淵設官一如舊制分南京所藏之書實其中自六經之外諸史百家靡不畢備其所以明道興治以繼先聖而裕後嗣者規

模弘遠矣予承 皇考 仁宗昭皇帝丕緒嗣守 列
聖洪業夙夜兢惕罔敢怠遑思惟經以載道史以載事
百氏之文亦所以羽翼斯道者也於是聽政餘閒數臨
于此進諸儒講論折衷宣昭大猷緝熙問學庶幾日就
月將造乎其極上可以承 祖考付托之重下可以安
黎庶仰戴之心而斯閣之傑然者亦遠有耀矣誦此則
知 文淵爲講讀之所非政府也其亦上古衢室總章
之遺意歟然雖非政府而 祖宗朝特此以緝熙 聖
學則所以端出政之本者在是矣

成祖定 華蓋 武英 文華三殿及 文淵閣 東閣
各學士一人正五品班翰林院學士之上各置閣門使

正六品 承天右順門待詔俱從七品 洪熙初添
謹身殿大學士

內閣之名始自 洪武先是 洪武十五年冬始做宋
制置 殿閣學士吏部尚書邵質 華蓋殿學士宋訥
文淵閣檢討吳伯宗 武英殿典籍吳沉 東閣並
爲大學士是年 召耆儒鮑恂張長年俞詮至 命爲

文華殿大學士三人辭不就是時特侍左右備顧問
未典機務 建文四年七月 成祖簡用翰林待詔解
縉編修黃淮尋又用修撰胡靖編修楊榮楊士奇檢討
胡儼金幼孜七人入 內閣各直 文淵閣預幾務
永樂五年十一月 上諭吏部廣等侍朕日久繼今考

滿勿改外任廣即胡靖也 仁宗又設 謹身殿大學士有 華蓋 謹身 武英三殿及 文淵東閣皆在內閣曰辦事避丞相名若 東閣 文淵閣大學士不得竟入 內閣亦不得預幾務也 嘉靖壬戌九月新建 三殿成 詔改 奉天殿爲 皇極殿 華蓋殿爲 中極殿 謹身殿爲 建極殿始有 建極殿大學士

內閣之官翰林院檢討編修修撰侍講侍讀講讀學士詹事府左右春坊司經局官官不得過五品或九卿正副兼翰林學士 東閣 文淵閣 武英 謹身 華蓋殿大學士已而加官至領 東官公孤帶三孤者或

止一二人多或止六七八人 宣德初張瑄陳山始以侍郎入閣未幾以干請出瑄爲南京禮部尚書山教內使書 景泰中王文始以 官保尚書入閣西東楊最久皆不得領吏部尚書領吏部尚書亦自文始其屬 制勅房 誥勅房皆以中書舍人諸司寺或卿貳之官至太常卿止即有年勞加俸不得帶九卿堂上執政官內閣之職入 內閣預機務出納 帝命奉陳規誨獻告謨猷點檢題奏擬議批荅以備顧問平庶政不得專制九卿事九卿奏事亦不得相關白凡上所下一曰詔二曰 誥三曰 制四曰 勅五曰 冊文六曰 諭七曰 書八曰 符九曰 令十曰 檄皆審置申

覆而調劑焉平允乃行之凡下所 上一曰題二曰奏
啓三曰表箋四曰講章五曰書狀六曰文冊七曰揭帖
八曰制對九曰露布十曰譯皆審置申覆而修畫焉平
允乃行之凡 經筵知經筵事或同知看定其講章日
講亦如之凡 東官出閣講讀領其事叙其官而授之
職業凡修 實錄史志諸書充總裁官 實錄成呈上
焚其草凡 宗室請名請封諸臣請謚並擬上焉凡圖
書籍寫讐校皆課而察之凡 郊祀 巡狩 親行扈
從凡 累朝 御文 實錄 實訓 玉牒之副古今
書皆籍而藏之凡會 勅稽其由狀而叙述上請焉凡
禮部會試 廷試貢士國子生月課歲貢生 廷試四

夷館譯生皆總領之 制勅房書辦 制勅 詔旨

誥命 冊表 寶文 王牒講章碑額題奏揭帖凡一

應機密文書及 王府 勅符底簿 誥勅房書辦文

官 誥勅番譯 勅書并夷書揭帖紀功勘合皆稽按

典故起草進書若漏洩稽緩遺失妄誤皆有罰

鄭曉曰自徐有貞來係二十人惟萬安丘濬以卿孤入

內閣餘皆修撰贊善通議少卿少詹事侍郎自焦芳

至于今非孤卿則六卿惟翟鑾以侍郎兼學士以故

內閣職業重于中書省體統尊于三公府省府之名雖

廢而 內閣之權益隆矣前此入 內閣者亦未必盡

出翰林西楊 齊府審理也文簡中書舍人也文靖戶

科給事中也文清監察御史也李文達賢吏部主事也

近日丹徒靳貴永嘉張孚敬安仁桂萼南海方獻夫貴

溪夏言亦中書舍人主事給事中也列聖嚴于防奸

而廣于求賢以故內閣諸臣類多效職三楊叅合歷

事四朝鎮定危疑消弭讒隙文經武緯內戢外寧四

十餘年號稱平治昭后張太后既崩裕陵正統親政

一時五相馬愉曹鼐陳循苗衷高穀才器尋常權歸閣振國社幾

搖景泰諸臣因人碌碌強者恣睢弱者韜默或陰主

邪謀或曲從密旨儲官易位宦貴紛然天順復

辟誅竄削逐臺閣一空成化間文憲文毅事關綱常

扣關力諫時值佞幸請劓行誅弘治初年大奸距脫

海內欣然宜興

徐濟洛陽

劉吉

端清寬綽長沙

李東陽

餘姚

謝遷

文雅諒直

泰陵

孝宗

晝接再三虛懷霽

色勵精訪治將大有爲而諸君子志在包荒意存裕蠱多思少斷坐失良期然十八年間財以足民爲富兵以薄伐爲威刑以緩死爲恩仕以驟進爲耻可謂與民休息培植元氣者正德初逆瑾用事盡逐方正大臣焦芳劉宇本衣冠之盜廁跡禁扉數年之間濁亂天下新都楊廷和守正應變綽有餘才雖大禮之議未協宸聞而救時之功卓冠一時矣

太常寺

遼

南面太常寺官曰太常寺卿曰太常少卿曰太常寺

丞曰太常寺主簿其下有博士贊引太祝奉禮郎協律郎其所屬大樂署有署令署丞鼓吹署亦有署令署丞法物庫掌圖籍有法物庫使法物庫副使

金 太常寺皇統三年正月始置太廟廩犧郊社諸陵大樂等署隸焉卿一員從三品少卿一員正五品丞一員正六品掌禮樂郊廟社稷祠祀之事博士二員正七品掌檢討典禮閱官一員從九品檢討二員從九品太祝從八品掌奉祀神主奉禮郎從八品掌設版位執儀行事協律郎從八品掌以麾節樂調和律呂監視音調太廟署皇統八年太廟成設署置令丞仍兼提舉慶元明德永祚三宮令一員從六品掌太廟衍慶坤寧官殿

神御諸物及提控諸門關鍵掃除守衛兼廩犧等事丞一員從七品兼廩犧署丞直長 明昌三年罷廩犧署令丞以太廟令丞兼掌犧牲及養飼等事宋以前太廟令皆屬宗正寺 郊社署承安三年設祝史齋郎百六十人作班祗僦使周年一替 大安元年奏兼武成王廟署令一員從六品丞一員從七品掌社稷祠祀祈禱并廳舍祭器等物直長正八品 武成王廟署大安元年置令從六品丞從七品掌春秋祭享以郊社令丞兼之 諸陵署提點山陵正五品涿州刺史兼令從六品丞一員從七品掌守山陵直長正八品

漢屬太常唐宋屬宗正

園陵署令宛平縣丞兼貞祐二年以園陵遷大興縣境

遂以大興縣令丞兼 大樂署兼鼓吹署樂工百人令
一員從六品丞從七品掌調和律品教習音聲并施用
之法樂工部籍直長一員正八品大樂正從九品掌祠
祀及行禮陳設樂縣大樂副正從九品 法物庫初兼
管大樂隸兵部 元貞二年改屬太常寺使從六品副
使從七品掌鹵簿儀仗車輅法服等事直長正八品
慶元宮小都監三員掌鋪陳祭器諸物餘官同 東京
西京御容殿閣門各二員掌享祀禮數鋪陳祭器東京
萬寧宮小都監一員

元置太常禮儀院秩正二品掌大禮樂祭享宗廟社稷封
贈謚號等事仁宗復太常禮儀院爲太常正三品天曆

二年復陞正二品定置院使二員正二品同知二員正三品僉院二員從三品同僉官二員正四品院判二員正五品經歷一員從五品都事一員從七品照磨兼管勾承發架閣一員正八品屬官博士二員正七品奉禮郎二員奉禮兼檢討一員並從八品協律郎二員從八品大祝十員從八品禮直管勾一員從九品所屬四太廟署即太廟令也古屬宗正寺元屬太常秩從六品掌宗廟行禮兼廩犧署事至元三年始置令二員從六品丞一員從七品 郊祀署屬太常秩從六品 大德元年始置令二員從六品丞一員從七品 大樂署屬太常秩從六品中統五年始置令一員從六品丞一員

從七品掌管禮生樂工四百七十九戶

皇明

國初設太常寺即秦奉常也漢景德初更名太常主郊廟
禮樂之事職列九卿歷唐設卿一人少卿爲之貳宋因
唐制俱居九寺之先 國初置太常司正三品設卿少
卿司丞其屬有博士典簿協律郎贊禮郎司樂大祝等
官職專祭祀之事 洪武三十年改司爲寺 永樂十
九年定鼎北京在留都省加南京二字但在留都正卿
少卿多用科日出身者推陞北寺自 列聖間用樂舞
生累資陞至卿寺甚或加禮部侍郎尚書掌寺事而因
循相沿遂襲爲例至 隆慶改元乃重推甲科出身者

補任非百世所當遵守者耶

太祖吳元年置太常稱司正三品 洪武二年置神牲所
設廩犧令大使副使 四年革神牲所 十二年置神
樂觀 二十四年設各祠祭署奉祀祀丞 三十年改
司爲寺 建文中改卿爲太常卿少卿寺丞分左右
天壇祠祭署爲南郊祠祭署泗州祠祭署爲泗濱祠祭
署宿州祠祭署爲新豐祠祭署 孝陵置鍾山祠祭署
及司圃所增神樂觀知觀一人 靖難後改鍾山祠祭
署爲 孝陵祠祭署 南郊祠祭署爲郊壇祠祭署已
又改爲 天地壇祠祭署餘如故 嘉靖中釐祀典改
天地壇祠祭署爲天壇別爲地壇各設祠祭署又改

山川壇籍田祠祭署爲先農壇祠祭署六祀殿奉祀爲
祈穀殿祠祭署又增朝日夕月二壇祠祭署

太常寺卿一人少卿二人提督四夷館少卿一人其屬
典簿二人博士二人神樂觀提點一人知觀二人協律

郎二人贊禮郎九人司樂二十人天壇祠祭署奉祀

一人祀丞二人地壇祠祭署奉祀一人祀丞一人朝日

壇祠祭署奉祀一人祀丞一人夕月壇祠祭署奉祀一

人祀丞一人祈穀殿祠祭署奉祀一人祀丞一人祖

陵 皇陵 孝陵 長陵 獻陵 景陵 裕陵 茂

陵 太陵 康陵 永陵 昭陵 十二祠祭署各奉

祀一人祀丞一人楊王徐王墳各有奉祀犧牲所吏目

一人吏十一人

太常卿掌祭祀禮樂之事總其官屬籍其政令以聽禮部少卿寺丞爲之貳凡天神地祇人鬼歲祭有常先歲孟冬進明年祭日上御奉天殿受之頒諸司凡上祭贊相禮儀大臣攝事亦如之若祭先期請省牲大祀上先省大臣繼省之進版銅人上殿素齋戒示諸司凡薦新品物移光祿寺凡國有冊封冠婚營繕出師歲時旱澇大災難請告郊廟社稷凡新王之國若朝還謁辭於寢廟凡祭滌器饗理香燭玉帛整拂神幄必恭潔凡玉三等曰蒼玉曰黃琮曰玉制帛五等曰郊祀曰奉先曰展親曰禮神曰報功凡牲四等曰犢曰

牛曰太牢曰少牢凡樂四等曰九奏曰八奏曰七奏曰六奏凡舞二曰文舞曰武舞凡樂器不徒凡 陵園之祭無樂凡祭掌燎看燎讀祝奏禮對引司香進俎舉麾陳設收支導引設位典儀通贊奉帛執爵司尊司鬯洗卿貳屬各共其事凡宴會率其屬奏樂提督四夷館少卿掌譯書之事以聽於翰林院凡八館曰鞑韃女直西番西天回回百夷高昌緬甸以國子生充譯字兼官民子弟時時校其業裁倖進焉典簿典勾校金穀察視禮數省署文移博士講習禮文請 上填名祝版大禮導贊其儀神樂觀提點知樂領樂生舞生而時教肄之進退其考贊禮卽設 君臣之位以奉祭祀之禮拜跪之

節皆贊導焉而承傳之協律郎司樂考協雅樂凡舞人
韻聲人籍數其名數而審肄之凡淫聲過聲凶聲慢聲
舞失節者皆禁糾之凡上至祀所夜警晨嚴凡祭先
期演樂太和殿凡大祀樂生七十二人舞生一百三十
二人凡壇署典守壇場殿宇廚庫林木時灑掃之以共
其祀事陵署亦如之牲犧所凡三祀牲牢咸有數養
而滌之籍田收穀納於神倉供五齋三酒之用穰藿飼
牲

穆宗隆慶中華太常寺協律郎等官四十八員存者二十
九員從禮部疏爲該寺定擬執事或兼攝或參用樂舞
生不得守師宗記所奏事例濫設冗員寺卿陳慶以禮

部疏引宗記爲喻疑有刺譏又以祠司移文不署名謂爲輕已乃上疏固爭以郊壇典禮煩重今槩擬裁革未免闕人廢事請下禮部熟計部議復持前說上報可于是吏部奏革協律郎等官悉如禮部奏旣議革慶內益不能平乃上疏請申明部寺職掌謂本寺非部所屬何得擅主裁革司官公移安得不署名因指禮部護短飾說無師師相讓之風禮部亦言國家設六部分理天下諸務爲政事根抵今以本部理太常之事爲侵擾則戶部之於錢糧兵部之於士馬皆爲侵擾矣惟聖明獨斷以一政體疏並下吏部吏部覆太常所掌乃祠部一事固不可槩謂部屬亦難謂全無統屬其公移

往來宜各仍舊 上從之